



## Lög Samtaka sveitarfélaga á Vesturlandi

### 1. gr.

Samtökin nefnast: Samtök sveitarfélaga á Vesturlandi,  
skammstafað SSV.

### 2. gr.

Markmið samtakanna eru:

- Að vinna að hagsmunum sveitarfélaganna á Vesturlandi einkum í atvinnu-, efnahags-, mennta-, skipulags-, samgöngu- og félagsmálum.
- Að efla samstarf sveitarfélaganna og stuðla að víðtækari þekkingu sveitarstjórnarmanna á verkefnum sveitarstjórna og vinna að því að gera verkefni sveitarstjórna eftirsóknar- og áhugaverð.
- Kynna kosti Vesturlands, efla samkennd íbúa og styrkja þjóðfélagslega aðstöðu landshlutans.

Samtökunum er ætlað að starfa í samvinnu við Samband Íslenskra sveitarfélaga eftir því sem við verður komið.

### 3. gr.

Aðalfundur skal haldinn ár hvert, eigi síðar en í aprílmánuði ár hvert. Stjórn samtakanna boðar til hans með sannanlegum hætti með minnst þriggja vikna fyrirvara og skal skýrsla stjórnar og ársreikningur fylgja fundarboðinu. Dagskrá skal send eigi síðar en tíu dögum fyrir fund. Aðalfundurinn er lögmætur, ef hann er löglega boðaður. Aðalfundur á kosningarári til sveitarstjórna, skal fresta dagskrárliðnum kosning stjórnar til málþings að hausti, sbr. 10. gr. laga þessara.

Stjórn SSV getur boðað fulltrúa sveitafélaganna skv. 4. grein saman til fundar þegar stjórn samtakanna telur ástæðu til, svo og þegar fjórðungur kjörinna fulltrúa eða fjórðungur sveitastjórna innan samtakanna óska, enda sé fundarefni tilgreint. Boðað skal til þeirra með tölvupósti með a.m.k. viku fyrirvara.



#### 4. gr.

Sveitarstjórnir kjósa fulltrúa á aðalfund SSV og málþing SSV skv. 10. grein laga þessara, til eins árs í senn og skal kjörtímabil þeirra vera frá 1. júlí til jafnlengdar næsta ár.

- Sveitarfélag með innan við 300 íbúa skal kjósa einn fulltrúa.
- Sveitarfélag með 300-700 íbúa tvo fulltrúa.
- Sveitarfélag með 700-1500 íbúa þrjú fulltrúa.
- Sveitarfélag með 1500-3000 íbúa fjóra fulltrúa.
- Sveitarfélag með fleiri en 3000 íbúa fimm fulltrúa.

Jafnmargir varamenn skulu kosnir eftir sömu reglum.

Kjörgengir eru kjörnir sveitarstjórnarmenn og varamenn þeirra, svo og framkvæmdastjórar sveitarfélaga.

Stjórn samtakanna er heimilt að bjóða til aðalfundar aðilum sem tengjast umfjöllun og starfi samtakanna, með málfrelsi og tillögurétt.

Hver sveitarstjórn skal senda stjórn samtakanna tilkynningu um kjör fulltrúa fyrir 1. Júlí ár hvert.

#### 5. gr.

Stjórn SSV skal skipuð sjö mönnum. Kjósa skal sérstakan varamann fyrir hvern aðalmann í stjórn. Aðalfundur kýs stjórn til tveggja ára í senn og skal formaður kosinn sérstaklega. Stjórnin kýs varaformann og ritara úr sínum hópi og skiptir að öðru leyti með sér verkum. Sá sem kjörinn hefur verið aðalmaður í stjórn þrjú kjörtímabil í röð, þ.e. sex ár, er ekki kjörgengur til stjórnar næstu tvö ár. Formaður sem hefur verið kjörinn tvö kjörtímabil í röð, þ.e. fjögur ár, er ekki kjörgengur til formennsku næstu tvö árin.

Við kosningu stjórnarmanna sé þess gætt, að þeir séu búsettir dreift um umdæmi samtakanna.

Stjórn SSV er óheimilt að stofna til annarra útgjalda en ákveðin eru í fjárhagsáætlun, sem samþykkt er á aðalfundi. Komi upp verkefni sem ekki er gert ráð fyrir í fjárhagsáætlun skal stjórnin kalla saman fund fulltrúa sveitarfélaganna skv. 3. grein og fá samþykki fyrir nýjum eða auknum útgjöldum eða samningum sem hafa í för með sér fjárhagslega skuldbindingu samtakanna.



#### 6. gr.

Aðalfundur skal ákveða heimilisfang samtakanna. Stjórn samtakanna ræður framkvæmdastjóra og annað starfsfólk og annast húsnæðismál og starfsaðstöðu samtakanna.

Fulltrúi Vestlendinga í stjórn Sambands íslenskra sveitarfélaga skal jafnan boðaður á alla stjórnarfundum og aðra sambærilega fundum á vegum SSV með tillögurétt og málfrelsi.

#### 7. gr.

Fyrir aðalfund skal stjórnin leggja til endurskoðaða reikninga samtakanna fyrir síðastliðið reikningsár og fjárhagsáætlun fyrir næsta fjárhagstímabil. Fundurinn skal úrskurða reikningana, afgreiða áætlunina og ákveða árstíllag sveitarfélaganna til samtakanna.

Dagskrá aðalfundar skal vera þessi:

- Skýrsla stjórnar, félaga og rekstrareininga, sem SSV ber ábyrgð á um starfsemi liðins árs.
- Ársreikningar SSV og þeirra félaga sem SSV ber fjárhagslega ábyrgð á, ásamt skýrslu endurskoðanda.
- Fjárhagsáætlun fyrir komandi ár og ákvörðun um árgjald.
- Starfsáætlun fyrir komandi ár.
- Kosning stjórnar og varastjórnar. (annað hvert ár)
- Kosning í þær nefndir sem starfa á milli aðalfunda.
- Ákvörðun um laun og þóknun til stjórnar og nefnda.
- Kosning endurskoðanda.
- Önnur mál löglega fram borin.

Árstíllag hvers sveitarfélags skal vera tiltekin upphæð á hvern íbúa sveitarfélagsins og auk þess ákveðið fastagjald sem ákveðið er á aðalfundi hverju sinni.

Gjalddagar skulu vera ársfjórðungslega.

#### 8. gr.

Reikningsár samtakanna skal vera almanaksárið.



9. gr.

Kostnaður við stjórn samtakanna, fundarhöld, ferðalög stjórnar og annar sameiginlegur kostnaður greiðist úr sameiginlegum sjóði samkvæmt ákvörðun aðalfundar. Hver sveitarstjórn greiðir ferðakostnað eigin fulltrúa á aðalfund SSV.

10. gr.

Stjórn SSV skal halda málþing um hagsmunamál sveitarfélaganna á Vesturlandi í septembermánuði ár hvert. Á þann fund hafa kjörgengi fulltrúar sveitarfélaganna samkvæmt 4. grein laga þessara. Stjórn samtakanna er heimilt að bjóða til málþingsins aðilum sem tengjast umfjöllun og starfi sambandsins, með málfrelsi og tillögurétt. Málþingið getur ályktað um þau mál sem borin eru þar upp og ræður afl atkvæða niðurstöðu máls.

11. gr.

Breyta má lögum þessum á aðalfundi. Tillögur til lagabreytinga skulu berast stjórn SSV a.m.k. tveimur vikum fyrir aðalfund. Tillögur til lagabreytinga skulu sendar út með dagskrá. Tillaga til lagabreytinga nær fram að ganga ef 2/3 hluti atkvæðisbærra fundarmanna á löglega boðuðum aðalfundi greiða henni atkvæði.

Þannig samþykkt á stofnfundi 22. des. 1969 með breytingum á aðalfundum 1974, 1985, 1988, 2001, 2004, 2006, 2007 og 2013.